

# Ekwo Jiona Onye Mpfuchiru Chileke

## *Jiona agbaru Chipfu oso*

<sup>1</sup> Chipfu ziru Jiona nwa Am̄itayi ozi sụ iya-a:  
<sup>2</sup> “Tụgbua jeshia eze mkpụkpu ono, bụ mkpụkpu Ninive je epfuru opfu nū ndu bu iya nū; kele ejo-ememe, ephe eme rwuwaru ẹka mu nọ.”

<sup>3</sup> Obenu lẹ Jiona gbalihuru gbalaa; ọ bụru iya eje mkpụkpu Tashishi. Ọ bya ejerwua mkpụkpu Jiopa; bya ahuma ugbo-mini, akwakọbe eje ọnu-enyimu mkpụkpu ono, bụ Tashishi. Ọ bya eje apfua ugwo bahu l'ugbo ono. A kpọru ugbo ono; ọ bụru phe eje Tashishi; ọ bụru ẹka ọgbalaru Chipfu.

<sup>4</sup> Tọbudu iya bụ; Chipfu byanụ ezia oke pherephere; ọ wata ezi l'eli eze-enyimu ono. Oke akpara-mini wata atutu; tūahaa k'ophu ugbo meaharu g'ọ nyakashihu. <sup>5</sup> Ndzụ wata agụ iphe, bụkpoo ndu nọ l'ugbo ono. Onyenonu wata arọ nshi iya ẹhu. Ephe pashiahaa iphe, nọ l'ugbo wata echie lẹ mini g'ugbo dū phekpala.

Obenu lẹ Jiona gbero nọdukpooro l'ohu ugbo ono; mgbenya tu-mihu iya. <sup>6</sup> Onye-ishi ugbo bya ejepfu iya je asụ iya: “?Bụ gūnu bẹ iime nno; gūbe nwophu eku mgbenya? ?Tii tehudu rọo nshi ngu ẹhu g'a maru nshi ngu obu ?l'a-rị-vu anyi l'oriri mee g'anyi ta ala l'iswi?”

<sup>7</sup> Ndu nọ l'ugbo ono nọnyaa bya asu: “Unu bya g'anyi tua ido gude maru onye bu iya eme anyi ahuma-a.” Ephe bya atua ido. O daaru Jiona.

<sup>8</sup> O buru iya bu; ephe jia ya su iya: “Yeeru anyi onu. ?Bu onye be ejo-iphe-a, l'eme l'ehu anyi-a shi l'eka? ?I meje gunu? ?I shi awe? Ali eka i shi ?aza gunu? ?I bu onye awe?”

<sup>9</sup> O bya eyeeru phe onu su phe le ya bukwa onye Hiburu. L'onye ya abajeru eja bukwa Chipfu; mbu Chileke k'imigwe; onye bu iya meru eze-enyimu; bya emee ali l'ophu. <sup>10</sup> O bya akoru phe g'onwuru yele iya. Ephe bya amaru l'oo agbala be oome g'o nahu Chipfu gbala.

Opfu iya ono mee; ndzu guahaa phe. Ephe jia ya su iya: “?O bukwanuru gunu be iime nno?”

<sup>11</sup> Mini ono nodu akakpøekwapho achi oku eje. Ephe bya ajia ya su iya: “?Bu gunu be anyi eme ngu g'eze-enyimu daaru anyi nyonyoronyo?”

<sup>12</sup> O su phe: “Unu palia mu ephekerephe paru chie l'ime eze-enyimu-a g'unu ahuma l'oodachaa nyonyoronyo. Mu maru-a l'oo mu kparu iphe, oke akpara-mini-a wataru unu atutu.”

<sup>13</sup> O betachia nno; ndu ono tuko ike phe mekota g'ephe kpøphu ugbo ono azu je apfube l'ali; ophu ephe adudu ike; kele eze-enyimu ono kabaa atangirihu eme le g'o shi du le mbu.

<sup>14</sup> Ephe tuko wata araku Chipfu su iya: “Gube Chipfu; jiko te emegbukwa anyi me anyi -gbua nwoke-a. G'ochi onye adudu iphe, o meru ta atukokwaru anyi l'ishi; kele o kwa g'o du ngu bu ge gube Chipfu meru.” <sup>15</sup> Ephe bya

apalia Jiona tufu l'ugbo ono; woru iya chie l'eze-  
enyimu ono; mini ono, achi warawara ono buru  
nyonyoronyo. <sup>16</sup> Iphe ono, meru nu ono mee;  
ndu ono wata atsu Chipfu ebvu okpobe atsutsu.  
Epe gwaa Chipfu bya ekweshia ya ukwe-ipe.

<sup>17</sup> Obenu le Chipfu dobewaru ophomu-okazu,  
lweru Jiona. Jiona no l'ime epho ophomu-okazu  
ono ujiku eto eswe l'enyashi.

## 2

### *Jiona epfu anu Chileke*

<sup>1</sup> Tobudu iya bu; Jiona bya anodu l'ime epho  
okazu l'eka ono wata epfu anu Chipfu, bu Chileke  
iya. <sup>2</sup> O pfua su:

Teke mu eje eze iphe-ehuka  
be mu rakuru Chipfu.

O numa olu mu.

O buru l'ime ali-maa be mu  
chiru g'a gbaaru mu  
mkpu.

I numa mkpu, mu echi.

<sup>3</sup> I paru mu chie l'ime  
ogbu-mini;  
mbu l'ohu-ali eze-enyimu.

Utso gbaa gbapyabe mu.

Akparamini ngu me  
gborogboro,  
oso nodukota awu  
mu awuwu.

<sup>4</sup> Mu pfua su: A chifuakwaru  
mu l'atatiphu ngu.

Ole mu a-dabekwa-a enya  
l'uzo eze-ulo ngu,

dụ nsọ ọzo.

<sup>5</sup> Gẹ mini meru g'o ria mu  
rimia;  
ogbu-mini lwee mu  
kawọmu.

Ẹlwubara mini kwechia mu  
ishi.

<sup>6</sup> Mu dalahụkpoepho l'ọhu  
l'ọhu eze úbvú.

Ọhu alị woru mu tụa mkpọro  
ojejoje.

Obenu l'ị gụtaru ndzụ mu  
l'iduma;  
mbụ gube Chipfu,  
bụ Chileke mu.

<sup>7</sup> Teke mu shi abyawaa  
atụ-buhu unme be  
mu nyataru gube  
Chipfu.

Mu pfuahaa opfu nụahaa  
ngu;  
opfu mu rwua ẹka ị  
nọ l'eze-ulo ngu,  
dụ nsọ.

<sup>8</sup> “Ndu bụ mkpọkoro ntẹkpe  
be ẹphe turu swiswia  
be o too rwuẹdu ẹka;  
mbụ eze-ipe-oma ono,  
e gege meru phẹ ono.

<sup>9</sup> Obenu ịe mbẹdua  
a-nọduepho agụ  
ebvu-ekele gude  
agwa ngu.

Iphe, mu kwere ukwe

ememe be mu e-mekota.  
 Ndzota bukwa onye ooshije  
 l'eka bu Chipfu!"

<sup>10</sup> Tɔbudu iya bu;  
 Chipfu bya atɔaru okazu  
 ono ekemu; o je agbofu  
 Jiona l'ali okponku.

### 3

#### *Jiona eje Ninive*

<sup>1</sup> Tɔbudu iya bu; Opfu Chipfu bya erwua Jiona  
 nchi k'ugbo ebo su iya: <sup>2</sup> "Tugbua je mkpukpu  
 Ninive; mbu oke mkpukpu ono; je ezia ndu bu  
 iya nu ozi, mu ziru ngu!"

<sup>3</sup> Tɔbudu iya bu; Jiona gbalihu; bya ejeshia  
 Ninive; g'o mee iphe, Chipfu suru g'o mee. Ninive  
 ono bu eze mkpukpu, paru eka apaa. Iphe,  
 eejeje ije teme aaghabua ya ebo bu ujiku eto.  
<sup>4</sup> Jiona bya ejee ije ujiku ophu gude bamihu  
 l'ime mkpukpu ono bya eje araahaa ya arara  
 su: "Iphe, o phoduru bu ukporo abali labo;  
 Ninive aburu mkpurupyata." <sup>5</sup> Ndu Ninive  
 bya ekweta ke Chileke. Ephe bya araa ya  
 arara su g'onyenonu wata aswiru Chileke egu.  
 G'ephe hakota bya eyee uwe-aphu; e -shikpo  
 l'onye kachaa shii l'ime phe; jasu l'onye kachaa  
 nwanshii.

<sup>6</sup> Eze ndu Ninive bya anuma iphe ono, ada nu  
 ono; o gbalihu l'aba-eze iya; bya eyefu akpawuru  
 uwe eze iya; bya eworu uwe-aphu gbaphua  
 onwiya; bya anodu anoo gwoo onwiya le nu. <sup>7</sup> O

bya ezia g'a raa órà gbaa Ninive mgburugburu sù:

“Wakwa iphe, eze yele ndu ephe l'iya bu ndu-ishi mkpukpu pfuru baa: G'ò tọ dukwa nemadzu; ọzoo anu; ọzoo eswi; ọzoo aturu, aduru iphe, oo-ri; ophu ọ dukwa onye a-ngu iphe, aangụ angungu. <sup>8</sup> G'a tuko nemadzu mekpoo anu phukota uwe-aphu. G'onyenonu wata araku ephe Chileke egwegwa. G'ephe tuko haa ejo-ememe, ephe eme; mekpoo mkpawere, ephe eme ndu ozo. <sup>9</sup> G'a maru ?Chileke a-ghakobe gude obu-imemini iya gbanwee oke ehu-eghu iya ono; k'ophu anyi taa laedu l'iswi.”

<sup>10</sup> O be teke Chileke humaru iphe, ephe meru; waa g'ephe gude ghakobe haa eme iphe-eji phe ono; o phuru phe obu-imemini; ophu o mebyisheduru phe g'o shi chia dobe le ya e-mebyishi phe.

## 4

### *Ovuma, Jiona avuru Chileke*

<sup>1</sup> Iphe ono du Jiona eji ntumatu. O ghuahaa ya eghe. <sup>2</sup> O bya epfuahaa nuahaa Chipfu su: “Gube Chipfu; ?to budu iphe-a be mu pfuru teke mu no l'ali anyi-a? O kwa iphe-a meru g'o gude mu mee egwegwa jeshia mkpukpu Tashishi; kele mu maru l'i bu Chileke, menukaru eze-iphe-oma; teme i nodu aphuje obu-imemini; ophu ehu eghujedu ngu eghe egwegwa; teme i nodu eyeje obu yegharu iya eka; i buru Chileke, e tee ekwojedu gburumu mee ge nemadzu buru ola-l'iswi. <sup>3</sup> Nta-a; gube Chipfu; gbua mu egbugbu; kele anwuhu ka mu ree eme l'anodu ndu.”

<sup>4</sup> Obenu lẹ Chipfu yeru iya ọnu sù iya: “Èhu-eghu ọwa-a, egbu ngu nù-a ?ọ gbaru ngu-a?”

<sup>5</sup> Jiona tųgbua je anọdu anọo l'ẹka lanų lẹ mgboru mkpųkpų ono; l'uzo ẹnyanwu-awawa iya. O je je atųaru onwiya mkpų l'ẹka ono; bya eje anọdu lẹ mkpula iya leahaa ẹnya gẹ ya maru iphe, e-mechaa mee mkpųkpų ono. <sup>6</sup> Tọbudu iya bų; Chipfu, bų Chileke bya emee gẹ vayinu futa l'ẹka ono; bya emee ya; ọ bachishia ẹkameka lẹ mkpula ẹka Jiona nọ bya emee g'ibvù dų l'ẹka ono gẹ Jiona ta aghahẹ chirichiri. Vayinu ono mee; ẹhu tsọahaa Jiona ọtso shii. <sup>7</sup> Obenu l'o beru l'ųtsu; lẹ nchitabọhu iya; Chileke bya eye ọnwu-ẹhu; ọ bya atanwua vayinu ono; ọ nwųlwashihukota. <sup>8</sup> Tọbudu iya bų; anwų chifuẹpho; Chileke bya awata ezi oke phẹrephere uguru, shi l'uzo ẹnyanwu-awawa; tẹme anwų chiahaa Jiona igbangu igbangu l'ishi; k'ọphu meji tọfuharu iya atọfu. O dų iya g'a sù lẹ ya nwųhuru. O sù: “Anwųhu kaakwa mu nų ree eme l'anọdu ndzụ.”

<sup>9</sup> Tọbudu iya bų; Chileke bya asų Jiona: “?O gbaru kẹ g'ẹhu wata ngu egbu egbu lẹ kẹ vayinu ono tọ?”

O sù iya: “Ee! Èhu egbukwa mu egbu. Mbų l'iphe, agų mu nų nta bųkwa anwųhu.”

<sup>10</sup> No iya; Chipfu bya asų iya: “?I humaru gẹ kẹ vayinu-a atsu-be ngu l'ẹhu; l'ẹbe abų l'ọo ngu kuru iya; ọphu ọ bųdu ngu meru iya ọ baahaa ọba. Nchi byaru abọhu; o futawaa. Nchi bya l'abọhu ọzo; ọ nwųhuwaa. <sup>11</sup> Obenu lẹ mkpųkpų Ninive bẹ ndu bu iya nų daghataru

ụkporo ụnu ụmadzu iri l'ise\*, bụ ndu amadụ onwophẹ ẹkicha; ọzoo ẹkutara; ẹphe nwek-warupho ikpoto eswi. ?Bụ eze mkpukpu, ha ẹgube ono bẹ mu tege aphuduru obu-imemini tọo?"

---

\* **4:11** 4:11 Bụ iya bụ 120,000 lẹ mbekee.



**Bayiburu Izii**  
**Izii: Bayiburu Izii Bible**

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

c6885c7c-c550-5b8b-a4fe-4bd714af4f6d